

**Kelab Tunas Saintis Muda Pupuk Minat Sains 100 Pelajar Sekolah***Ahli kelab dan staf yang terlibat dalam majlis pelancaran.*

**SERDANG, 5 Jun** – Fakulti Sains Universiti Putra Malaysia (UPM) membimbang 100 pelajar sekolah sekitar Serdang berumur 6 sehingga 17 tahun meneroka bidang sains melalui Kelab Tunas Saintis Muda.

Kelab yang pertama kali ditubuhkan itu terbahagi kepada empat kumpulan berdasarkan peringkat umur iaitu bongsu, kecil, junior dan senior.

Dekan Fakulti Sains UPM, Prof. Dr. Sidek Ab. Aziz berkata kelab itu bertujuan memupuk minat pelajar dalam bidang sains dengan menggunakan konsep bermain sambil belajar.

“Minat pelajar terhadap sains perlu dipupuk sejak kecil kerana mereka adalah aset negara yang akan menggantikan kita suatu hari nanti.

“Laman web kelab kelab itu dalam bahasa Melayu dan bahasa Inggeris diharapkan dapat mempromosikan program kelab supaya mendapat kolaborasi dengan pihak sekolah dan memupuk kesedaran sains pelajar,” katanya pada majlis pelancaran kelab itu di sini.

Sementara itu, Pengerusi Program, Dr. Muskhazli Mustafa berkata program itu mewujudkan keseronokan dalam sains melalui aktiviti-aktiviti yang berkaitan penggunaan dan konsep sains dalam kehidupan seharian pelajar.

“Penubuhan kelab ini bukan sahaja untuk memenuhi tanggungjawab sosial fakulti terhadap masyarakat malah ia merupakan inisiatif fakulti untuk memberi galakan kepada pelajar sekolah meneroka kerjaya dalam bidang sains,” katanya.

Aktiviti yang dijalankan ialah origami, melawat ke makmal dan Muzium Zoologi, Jabatan Matematik, ice breaking, apresiasi sains, kuiz interaktif dan diskusi kerjaya dalam bidang Sains.

Aktiviti lain ialah ujikaji terhadap belon udara dan elektrolisis, payung terjun, fizik dan magnet, ketumpatan, perkongsian ilmu dalam kumpulan dan simulasi gunung berapi.

**Berita ini disediakan oleh Seksyen Media, Bahagian Komunikasi Korporat UPM.  
(Noralis Buang 'wartawan pelatih' 03-89466014).**